

Lizer de Kentan ar blâ Fanch Kouer d'e zepute (1)

320

War dôn : *Lâr d'in, martolod, ma mignon* (KANAOUENNOU TALDIR, 1900)

1

Salokra's, ôtrou Depute,
Na vet ket re souezet
Ma teuan dre lizer fete
Da gas d'ac'h ma zamm reked ;
Me n' on ket den da valan groz,
— Klevout rafec'h gant ma gwreg, —
Met e renkan lâret ma fôz...
N'on ken 'vit serri ma beg.

2

Me 'zo eun denig a nefra,
Met eun den on, koulskoude,
En deus poan o c'honit bara
D'e wreg ha d'e vugale ;
Diskalon 'vêr da labourat,
Pa glever brud o sevel
Oc'h krog da zastum, a vriad,
Bilhejou 'leiz ho kodel.

3

Me eo kresket ma mêreri,
(Ha kresket ma bugale).
Kresket labour ermêz, en ti,
Ma karfen astenn an de ;
Kresket ma c'hontributionou
Ha ma deveziou hent bras,
Kresket ma foan, ma zrubaillhou...
Ha 'vit petra, sort tragas ?

4

Mar bije bet evit digas,
A bep tu, war hon mêziou,
Elec'h henchou-treuz, henchou bras,
Frankiz da vont d'hon farkou,
Neuze c'houi vije bet meulet,
Gant an holl, a bep koste ;
Me gred e vijec'h bet douget,
Hep gaou, ôtrou depute !

5

Mar bije bet 'vit rei d'Helen,
Neve chomet intanvez,
Gwerz eun tammig bara ouspenn,
D'ezi ha d'he c'hanailhez ;
Pe da Lom goz, ma amezeg,
Eun tamm butun bob eiz de,
Mije ket digoret ma beg.
Nann sur, ôtrou depute.

6

Met (gant despêt hen lavarant),
N'on ket evit kaout joa
Ouz ar pinvidig, p'hen gwelan,
War goust ar paour o larda ;
O 'nem serviji, digabestr,
O kargan e c'hodello,
En eul lavarout : « Me 'zo mestr ;
Klemmet an neb a garo ! »

7

Kaer 'm eus. n'on ket 'vit truezi
War ho stad, e Kambr Paris,
Pa glevan 'n eus neb a ya di
Tost pevar mil lur ar miz...
Kaout kambr en eur arruout
Hag eur gopr seurt da hennez ?...
Kompren, — ze 'zo dreist d'am galloud, —
Klemmfec'h war ho tienez !...

8

'N ho kambr ho peus kig ha bara
Da zibri etre pep pred ;
Ho peajou 'peus 'vit netra
Ha timbchou pez a garet ;
Mariana n'eo ket eur gwall blac'h,
Nann sur, ôtrou depute,
Pa deu ket da c'houl diganac'h
Konchou al lun ar beure...